

- लौह पुरुष सरदार वल्लभ भाई पटेल री जयंती राष्ट्रीय एकता दिवस रे मौके काल पूरा देश मांय रन फॉर यूनिटी राख्यी जावेला।
- देश मांय हाल तांई दस हजार किसान-उत्पादक संगठन बणायी ज्या-52 लाख किसानों ने फायदो मिल्यो।
- उपमुख्यमंत्री दिया कुमारी पुष्कर कॉरिडोर रो काम बेगो सरू करावण रो ऐलाण कीनो।
- केन्द्रीय माध्यमिक शिक्षा बोर्ड 10वीं अर 12वीं रा इम्तिहान रो कार्यक्रम जारी कीनो।

000

लौह पुरुष सरदार वल्लभ भाई पटेल री जयंती काल राष्ट्रीय एकता दिवस रा तौर ऊँ मणायी जावेला। ई मौके गुजरात रा केवड़िया मांय एक भारत, श्रेष्ठ भारत री निशाणी रा तौर ऊँ एकता परेड निकाळी जावेला। गृहमंत्री अमित शाह बतायो के प्रधानमंत्री नरेन्द्र मोदी ई परेड रो उद्घाटन करेला। हर साल 31 अक्टूबर ने केवड़िया रा एकता नगर मांय आ परेड राख्यी जावेला। बिहार री राजधानी पटना मांय खबरनवीसां सागे बातचीत करता थकां गृह मंत्री कह्यो के देश मांय मोटा पैमाना माथे रन फॉर यूनिटी राख्यी जावेला।

000

राष्ट्रीय एकता दिवस रे मौके प्रदेश मांय ई भांत-भांत रा कार्यक्रम राख्या जावेला। भीलवाड़ा जिला मांय नौजवानां मांय जिम्मेदारी अर एकता री भावना जगावण सारू 'यूनिटी मार्च' राख्यी जावेला। जिला स्तर माथे 31 अक्टूबर ऊँ 25 नवंबर तांई पदयात्रावां निकाळी जावेला ज्यो पाछे राष्ट्रीय पदयात्रा निकाळी जावेला। ई सिलसिला मांय पाली मांय एडिशनल एस. पी. विपिन शर्मा साइबर जागरूकता रैली ने हरी झंडी बता र रवाना कीनी। रैली मांय एनसीसी रा कैडेट्स अर स्कूली विद्यार्थी शामिल व्ह्या। वठे काल 'रन फॉर यूनिटी' राख्यी जावेला।

000

देश मांय हाल तांई दस हजार किसान उत्पादक संगठन एफ.पी.ओ. बण गया है। केन्द्रीय कृषि अर किसान कल्याण मंत्री शिवराज सिंह चौहान आज नई दिल्ली मांय दो दिन रा एफ. पी.ओ. समागम 2025 मांय आ जाणकारी दीनी। वे बतायो के आं मांय ऊँ कुछ एफ.पी.ओ. रो कारोबार एक सौ करोड़ रुपया रा लेवल तांई पूग ग्यो है।

000

कृषि मंत्री कह्यो के सरकार माली व्यवस्था ने बधावो देवण अर खेती बाड़ी री उपज मांय विविधता लावण सारू एकीकृत खेती-बाड़ी ने बधावो दे रही है। श्री चौहान कह्यो के काश्तकारां ने बेहतर किस्म रा बीज मुहैया करावण सारू सरकार बेगो ई बीज कानून लावेला। वे कह्यो के खेती-बाड़ी मांय महिलावां ने मजबूत बणावण सारू वां ने आधी हिस्सेदार बणायी जावेला।

000

राज्यपाल अर विश्वविद्यालयां रा कुलाधिपति हरिभाऊ बागडे देश रा नौजवानां रा बुद्धिमानी रा कामां री दुनियाभर मांय मांग ने देखता थकां विश्वविद्यालयां ने आला दर्जा रो मानव संसाधन तैयार करण माथे खास ध्यान देवण सारू कह्यो है। वे कोटा विश्वविद्यालय रा कुलगुरु, विभागाध्यक्षां अर अध्यापकां सागे बातचीत रे दौरान बोल रह्या हा। श्री बागडे विश्वविद्यालयां ने विद्यार्थियां रा शारीरिक विकास सारू अच्छी व्यायामशाला बणावण अर हॉस्टल मांय सुबीता बधावण रा हुकम ई दीना।

000

मुख्यमंत्री भजनलाल शर्मा भगवान बिरसा मुंडा री डोढ़ सौ वीं जयंती रे मौके मनाया जावण वाळा जनजाति गौरव दिवस री तैयारियां रो आज जायजो लीनो। वीडियो कॉन्फ्रेंसिंग रे जरिये अहलकारां सागे मीटिंग कर र वे बिरसा मुंडा री जिन्दगी अर देश री आजादी री लड़ाई मांय वां रा योगदान री जाणकारी जनता ताई पूगावण बाबत् कह्यो। मुख्यमंत्री एक और मीटिंग मांय महाराणा प्रताप ट्यूरिस्ट सर्किट, पूछरी का लौठा अर तनोट माता मिन्दर मांय विकास रा कामां रो जायजो लीनो।

000

जग प्रसिद्ध अंतर्राष्ट्रीय पुष्कर मेळो औपचारिक तौर ऊँ आज सरु व्ह्यो। इण रा उद्घाटन जळसा मांय उपमुख्यमंत्री दिया कुमारी कह्यो के पुष्कर कॉरिडोर री विगतवार परियोजना रपट—डीपीआर बण ग्यी है अर बेगो ई इण रो काम सरु कर्यो जावेला। पारंपरिक रिवाज अर नगाड़ां री गूज सागे सरु व्ह्या पुष्कर मेळा ने दिया कुमारी संस्कृति अर आस्था री निशाणी बतायो।

000

5 नवंबर ताई चालण वाळो ओ मेळो राजस्थान री लोक कला, संगीत अर रीति—रिवाज ने जणातो थको उत्सव है जिण मांय मोटी तादाद मांय सैलाणी शामिल व्हे रह्या है।

000

मुख्यमंत्री भजनलाल शर्मा सगळा ऊँ गौ—सेवा सारु समर्पित भाव ऊँ काम करण बाबत् कह्यो है। वे आज गोपाष्टमी रे मौके जयपुर री मांग्यावास अर रेनवाल री गौशालावां मांय जोड़ायत सागे गौ पूजन रे मौके बोल रह्या हा। मुख्यमंत्री कह्यो के गौ माता म्हाणो गौरव अर जिन्दगी री बुनियाद है। श्री शर्मा कह्यो के सरकार गायाने ने बचावण सारु सगळा जतन कर रही है अर पंजीकृत गोशालावां ने हर गाय सारु 50 रुप्या रोजीना अर किसानां ने सालाना 30 हजार रुप्या री सब्सिडी दी जा रही है। चूरु मांय गोपाष्टमी रे मौके शोभायात्रा निकाली ज्यी। पाली री रोहट गौशाला मांय 501 किलोग्राम लापसी बणा र गोवंश ने खिलाई ज्यी अर गिरदाड़ा गौशाला मांय भागवत कथा सरु व्ही। भरतपुर मांय गौसेवकां रो मान करी ज्यो।

000

रेलवे टेसनां माथे मोटी तादाद मांय लोगां री मौजूदगी ने ध्यान राखता थकां रेल मंत्री 76 रेलवे टेसनां माथे यात्री होल्डिंग एरिया विकसित कर्या जावेला। आं मांय जयपुर, गांधीनगर जयपुर, अजमेर, जोधपुर अर रींगस टेसन ई शामिल है। होल्डिंग एरिया मॉड्यूलर डिजाइन मांय स्थानीय जरूरतां रे मुजब बणाया जावेला। रेल मंत्री आं 76 टेसनां माथे बणाई—चुणाई रा काम आवता साल रा त्यौहारी सीजन ऊँ पैली पूरा करण रा हुकम दीना।

000

केन्द्रीय माध्यमिक शिक्षा बोर्ड साल 2026 मांय ली जावण वाळी मैट्रिक परीक्षा अर 12 वीं कक्षा रा इम्तिहान री तारीखां रो ऐलाण कर दीनो है। बोर्ड रे मुजब मैट्रिक रा इम्तिहान 17 फरवरी ऊँ 10 मार्च 2026 ताई जद के सीनियर सैकेण्डरी रा न्यारा—न्यारा संकायां रा विद्यार्थियां री परीक्षा 17 फरवरी ऊँ 09 अप्रैल ताई चालेला।

000

वोटर लिस्टां रा 'विशेष गहन पुनरीक्षण—एस.आई.आर रो दूजो दौर सरु व्हे ग्यो है। राज्य मांय जयपुर, भीलवाड़ा, श्रीगंगानर अर जैसलमेर मांय जिला निर्वाचन अधिकारी सियासी पार्टियां रा नुमाइन्दां सागे मीटिंग कर र अभियान री जाणकारी दीनी। अभियान रा तैत 4 नवंबर ऊँ 4 दिसंबर ताई बूथ लेवल ऑफिसर—बीएलओ घर—घर जा र परिगणना फॉर्म बांटेला अर भर्योड़ा फॉर्म भेळा करेला। भीलवाड़ा रा जिला कलेक्टर जसमीत सिंह संघू बतायो के 3 नवंबर ताई सिखावण पाछे 4 नवंबर ऊँ घर—घर जा र गणना फॉर्म बांट्या जावेला।

000

कोटा मांय ई जिला कलेक्टर आज सियासी पार्टियां रा नुमाइन्दा सागे मीटिंग कर र वां ऊँ ई अभियान मांय मदद देवण री अपील कीनी।

000

राज्य मांय आज ई केई ठौड़ां बादळा मंड्या रह्या अर छांटो-छिड़को व्ह्यो। सीळो बायरो बाजण ऊं थोड़ी ठण्ड रो एहसास ई व्हेवण लाग्यो है। मौसम विभाग आज ई बिरखा व्हेवण रा आसार जताया है, जदके 3 नवंबर ऊं एक और पश्चिमी विक्षोभ सक्रिय व्हेवण री संभावना है। चित्तौड़गढ़ मांय दिन री बगत पारो 20 डिग्री सेल्सियस रे आरे-सारे दर्ज करी ज्यो। बाड़मेर मांय ई ठण्ड रो असर बधबा लाग्यो है। सिरौही मांय खुशनुमा मौसम ऊं माउंट आबू आवण वाळा सैलाणियां री तादाद बध रही है। दूजी कानी डींग रा कुछ हलकां मांय पाणी भर जावण ऊं साखां ने नुकसाण री शंका है।

000

1 नवम्बर ऊं पूरा प्रदेश मांय एक महीना रो 'सघन निरीक्षण अभियान' चलायो जावेला। 30 नवंबर तांई चालण वाळा ई अभियान सारू मुख्य सचिव सुधांश पंत जिला कलेक्टरां ने लगातार निगराणी राखण रा हुकम दीना है। पी.डब्ल्यू.डी., नगरीय विकास अर आवासन विभाग, स्वायत्त शासन विभाग अर समग्र शिक्षा अभियान ऊं जुड़्या कामां री जांच सारू हर जिला मांय तीन निरीक्षण समितियां बनायी जावेला जो सड़कां अर मकान बणावण अर मरम्मत रा कामां री जांच कर र रपट सूपेला।

000

देश री विधायिका, न्यायपालिका अर कार्यपालिका ने डिजिटल बनायी जा रही है। संसदीय कार्य मंत्री किरन रिजिजू आज नई दिल्ली मांय राष्ट्रीय ई-विधान एप्लीकेशन-नेवा रा बारा मांय राखी ज्या तीजा राष्ट्रीय सम्मेलन मांय आ जाणकारी दीनी। वे कह्यो के विधायिका, न्यायपालिका अर कार्यपालिका कामकाज मांय सुधार सारू डिजिटल तकनीक को काम ले रही है।

000

महिला विश्व कप रो दूजो सेमीफाइनल मुकाबलो आज मुम्बई मांय भारत अर ऑस्ट्रेलिया बीचे खेल्यो जा रह्यो है। ऑस्ट्रेलिया री टीम 49 ओवर अर 5 गेंद रा खेल मांय 338 रन बनाया अर आउट व्हे गयी। भारत री ओर ऊं श्रीचरणी अर दीप्ति शर्मा दो-दो जद के क्रांति गौड़, ए. कौर अर यादव एक-एक विकेट लीना। होड़ रा पहला सेमीफाइनल मांय दक्षिण अफ्रीका, इंग्लैण्ड ने हरा र फाइनल मांय पूग गयी है।

000